



Oqaasiliortut ataatsimiinnerat 07.02.2019 nal. 10.00-13.00

Ilimmarfiup atuagaateqarfiata ataatsimiittarfiani

Peqataasut

Oqaasiliortunit: Mariia Simonsen, Juaaka Lyberth.

Oqaasileriffimmit: Lisathe Møller, Katti Frederiksen.

Peqataaangitsoq

Oqaasiliortunit: Knud Møller.

1. Oqaluuserisassat akuerineqarnerat

Oqaasiliortunut ilaasortat marluinnaat ataatsimeeqataanerat pissutigalugu ataatsimiinnermi oqaluuserisassat allannguuteqartinneqarput:

1. Oqaluuserisassat akuerineqarnerat.
2. Imaqarniliap akuerineqarnera.
3. Siulittaasumit Oqaasileriffimillu ilisimatitsissutit.
 - a. Oqaasiliortut periusissioinnissaannut tunngasumik suliaqartut killiffimminnik paasissutissiinerat
 - b. Oqaasileriffimmit paasissutissat
4. Aternik akuersineq
 - a. Daania/Dania
 - b. Juusut
5. Aalajangiiffissat allat:
 - a. Internet – toornivik
 - b. Blåfnet tun - tun tungujortunik avaleraasalik
6. Ataatsimiinnissap tulliaata ullulerneqarnera.
7. Tamalaat.

2. Imaqarniliap akuerineqarnera

28/11- 2018 ataatsimiinnermit imaqarniliap akuersissutigineqarnissaa ataatsimeeqataasut marluinnaanerit pissutigalugu tulliani ataatsimiinnissamut kinguartinneqarpoq.

3. Siulittaasumit Oqaasileriffimillu ilisimatitsissutit

- a) Oqaasiliortut periusissioinnissaannut tunngasumik suliaqarnermi killiffik siulittaasup ilisimatitsissutigaa. Oqaasiliortut inatsit naapertorlugu pisussaaffii Oqaasileriffimmi qanoq



suliarineqartarnersut qulaajarneqarpoq, qulaajaanerlu ataatsimiinnermi tullermi itisilerlugu sammineqassaaq.

b) Oqaasileriffimmit ilisimatitsissutit:

1. Oqaasileriffik Namminersorlutik Oqartussat illorsuannut 4.salimut nuuppoq.
2. 2018-imi aningaasat atunngitsuugamernit taaguusersuuserinermik ineriartortitsinissamut programmimik I-termik pisinermut atorneqarput. I-term Danmarkimi taaguutinik ineriartortitsinermut programmiliortartup DANTERM-ip pilersitaraa. Pisinermi ilanngunneqarput programmimik i-termimik atuisinnaanissamut pikkorissaaneq. Taaguusersuutinik sulialik Lisathe Møller I-termimik Danmarkimut pikkorissarialerpoq.
3. 2019-imi Aningaasanut Inatsisissamut 1.januar 2019 aallarnerfigalugu Oqaasileriffik marlunnik atorfinitsitsissamut aningaasartuutissanik ikkussigaluarpoq, aningaasalli Naalakkersuisunit sipaarutissatut peerneqarput, saniatigullu Oqaasileriffimmut aningaasaliissutit 100.000 kroninik ilanngarneqarlutik.
4. Allagaatinik katersiviup tamanit atorneqarsinnaalerluni ujaasiffigineqarsinnaasunngortinneqarnissaa sulissutigineqassaaq. Tassani programmøri interfaceliornissaaq pillugu saaffigineqareerpoq.
5. Naalagaaffiit Peqatigiit ukioq manna nunat inoqqaavisa oqaasiinut ukiorititaraa, tamannalu qanoq Oqaasileriffimmi malunnartinneqassanersoq januaarimi aatsaat aalajangiiffigineqassaaq. Taamatuttaaq Oqaasileriffiup ukiunik 20-nngortorsiornera qanoq akeqanngitsumik malunnartinneqarsinnaanersoq eqqartorneqarlunilu aalajangiiffigineqarumaarpoq.
6. Kultureqarnermut Naalakkersuisoqarfiup ilisimatippaatigut ataatsimeeqatigalutalu aningaasanik qinnuteqaammik EU-mut nassiussilluta misiliisinnaasugut. Tassani inatsisilerinermi taaguutinik ineriartortitsinissap, Inatsisartut aalajangiussimasaasa timitalerneqarnissaa, eqqarsaatigineqarpoq. EU-p aningaasaliinera taamaallaat 2019-2020-mut atuutissaaq.
7. Arctic Fundersimi siunnersuisoqatigiit decembarimi Oqaasileriffimmiipput ilisimatillutalu 2019-imi oqaatsinik suliniutinut pitsaasunut aningaasanik qinnuteqarsinnaasugut. Arctic Fundersikkormiut nunatsinnit qinnuteqarsimasunut 400.000 kr. agguaattussaavaat. AF-ip aningaasaliinera taamaallaat 2019-imut atuutissaaq.
8. Nunat inoqqaavisa oqaasiinut ukiorititami immikkut saqqummiisoqarani aaqqissuisoqassangilaq, allatigut tamanna malunnartinneqassammat.



9. Iitsoqqussaralugu Oqaatsit Ulluanni immikkut ittumik Oqaasileriffik Nuuk Centerimi aaqqissuiniarpoq kalaallit oqaasiinut tunngasunik nivinngaassuinikkut kalaallit oqaasii malunnartinneqassallutik.

4. Aternik akuersineq

- a. **Daania** nukappiaqqat atiattut qinnutigineqarpoq . Daania qallunaat atiannit Danielime-ersuuvoq, kalaalinngorsarlugulu akuerisassanngorlugu Oqaasiliortunut qinnutigineqarluni. E-mailikkut taasissutigineqarnerani taasinerit amerlaqatigiimmata aalajangiisoqanngilaq, maannali taamani akerliusoq isumaqataalermat ateq Daania nukappiaqqat atiattut akuerineqarpoq.
- b. **Juusut** niviarsiaqqat atiattut akuerisassanngorlugu qinnutigineqarpoq. Qinnuteqartup aanakassagigalua Justinemik ateqartoq Juusut-mik taaneqartarsimavoq. E-mailikkut taasissutigineqarnerani amerlanerussuteqartut itigartereeraluaraat akerliusup isummaminik allanngortitsinera tunngavigalugu niviarsiaqqat aqqattut akuersissutigineqarpoq. Ataatsimiinnerup siulianiit 7/2-2019-ip tungaanut inuit aqqi e-mailikkut aalajangiiffigineqartut:
 - Killiaq 5/12-2018.
 - Aaningu 14/12-2018.
 - Tivi 9/1-2019.
 - Atinguaq 10/1-2019.
 - Ivvii 29/1-2019.
 - Múte 29/1-2019.

5. Aalajangiiffigisassat allat

- a. Taaguutip *internettip* kalaallisut taaguutissaanik siunnersuuteqartoqarpoq. Siunnersuuteqartup internettip taaguutissaatut siunnersuutigaa “toornivik”. Internetti toornivillu isummamikkut imminnut ungasippallaarmata *Oqaasiliortut najuuttut siunnersuutip akuerineqarnissaa inassutiginnigilaat, ataatsimiinnermullu tullermut aalajangigassanngortillugu.*



- b. Aalisagaq qallunaatut *blåfinnet tunimik* taaguuteqartoq kalaallisut taaguuseqqullugu saaffiginnissutigineqarpoq. KNAPK-mit avataasiorlutillu aalisartunit **tun tungujortunik avaleraasalik** taaguutissatut piukkunneqarpoq. Paasissutissat sulii amerlanerusut Oqaasiliortunit paasiniaqquneqarput, soorlu sumi uumasuunera, ilisarnaatai, tuninit allanit suna allaassutigineraa ass.

6. Ataatsimiinnissap tulliata ullulerneqarnera

Ulluliisoqanngilaq.

7. Tamalaat

Eqqartugassani nr. 7-mi suliat allat pillugit ilisimatitsisarnermi taaguusersuutininik suliaqarnermut tunngasunik paasissutissiisoqartalernissaa aalajangiunneqarpoq.

Ataatsimiinnermi peqataasut:

Mariia Simonsen

Siulittaasoq

Juaaka Lyberth

Ilaasortaq

Imaqarniliaq atuarpara:

Knud Møller